

CODINTO YACNOCQUIDON ISTE 2

¹ Pabado nebi. Nuquin Papa bunacpadomboen Esuquidistun, Ĕbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

² Matses icsaquid icsho cuidnushe quiash abided ciudadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

Bědambo icmianquidquio Nuquin Papa

³ Nuquin Papa nad iqueque. Tantia. Chuinu. Ĕbi uněsquio icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. ⁴ Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. ⁵ Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. ⁶ Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquio icmec, quec tabadta.

⁷ Utsin mëyanaid icquimbi Esuquidistu tantesa uainquio iquec, quequin mibi tantiec tsadebi. Ĕbi mëyanacpaden mibi mënyansho isun Nuquin Papan bėdambo icmiaid mibi iquendac.

⁸ Nidaid Asia caid yacnoshon ěbi natiameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocon natiamioſhi. Adoac, Unėsebi, quiobi. ⁹ Unėſ uatiad, utsibo qesho tantiaſh, Ĕbibi mēnchiquidtiapimboquimbi matses unėſacſho uincuemequidēn ěbi mēnchicſiaſh, quequin tantiec tsadobi. ¹⁰ Ai, unėſ uanu, cac natiapobi. Adſho Nuquin Papan mēnchicaid nebi. Adembidi aidēmbi ěbi mēnchicſitenec. Unėſ uatsenſho isun ěbi mēnchicacpaden ěnenquiocquin napashun, quequin tantiec tsadebi. ¹¹ Ĕbi tantiaquin mibitediſhun chiac Nuquin Papan mēnchicmiaid nebi. Aden mimbi chiac unėſ uanu, qesho tantiaſhun mimbi Pabado mēnchiccoc. Mibi bėdamboquid nec, Papa, quequin ma dadpenſhun ambi naid chuipanuna.

Nėbi mibi yacno nidenquio iquebi, quiaid

¹² Bėdamboec tabadquin ismequid nebi, quequin tantiec bėdambo iquebi. Adaid chuinu. Tantia. Nuquin Papan ěbi tantiamiacpaden ismec utsibobėd bėdamboec tabadobi. Adquiecbidi mibėdi tabadobi. Matsesēn tantiamiacpadpenquio yec tabadobi. ¹³ Ma tantiamenueshun abimbo chuiquin mibi dada uashunec nebi. Ĕmbi dada uaid bedshun isec, Pabado bėdamboec tabadec, quequin ěnenquiocquin tantiapashun mibitediſhun. ¹⁴ Ĕbėd Pabado bėdamboec tabadoſh, quequin tantiec bėdambo iquebi, quec utsi-utsiec. Adecbidi, Codinto yacnocquido utsi-utsiec bėdamboec tabadoſh, quequin utsibon chuisho tantiaſh bėdambo

iquebi. Esuquidistu choanuc adquequi Codinto yacnocquido tabadpashun, quec tsadebi.

¹⁵ Aden ëbi bëdamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bëdambo iquebi, quepashun, caimbi mibi. ¹⁶ Mibi isbidanec nidaid Masedonia caid yacno nidashic padpiden mibi isbëtsenec choaibi. Aden isbëtsenembi, qesho tantiashun nidaid Udeya caid yacno mimbi ëbi nidmetsiac, quequin mibi chiombi. ¹⁷ ¿Uquëducshun, Nidenquio iquebi, quequin muaquindambi chuidio? Adenquiocquin chiombi.

¹⁸ Ambi chiacpadomboen nabanquidquio Nuquin Papa nec. Aid chuinu. Tantia. Abimbo chuiquidquio yec utsi yantiapimbo iquec. Adquidquio icquin ambi, Esuquidistu chuibeneta, caidquio yec adomboen chuiquid nebi. Utsi uain chuinu, quesa nebi. ¹⁹ Ambi chiacpadomboen nabanquidquio Nuquin Papan Madombo, ëmbi chuibeniaid, Esuquidistu nec. Aidi Sidasën chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquio yec utsi yantiapimbo iquec. Abi chuibenequidquio adquidbidi nec. ²⁰ Con Madon naden naindac, quequin Nuquin Papan chiacpadomboen Esuquidistun ënden nabanac. Aden abi nabanec. Ambi chiacpadomboen naquidquio Esuquidistu nec, quequin tantiaquin ambi naid ëbipadquidon chuibanec. Aden chuibanac abi tantiaquidquio yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. ²¹ Nuquin Papan tantiamiac: Esuquidistu tantiaquid nebi, quiash, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac. ²² Adembidi aton bacuë icmiaid nuqui nec. Adembidi aton Mayan Nuquin Papan meniaid nuqui nec. Èbëd tabadquid aido nendac, quequin tantiamenuen

Nuquin Papan aton Mayan meniac ma aidëmbi nuqui bëdambo icmepanueshun.

²³ Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquo iccobi. ²⁴ Ëmbi Esuquidistu chuibanac abi tantiaquid dadpen iquec. Aidon icbopenquo nebi. Aidon icbopenquiobidi Esuquidistu chuibanquid utsibo nec. Esuquidistu tantiec bëdambo iquebi ma quenu, quequin chuibenequidquo nebi. Esuquidistu tantiaquid nebi, abimbo quequin aid tantesa uainquo mimbi iquendac.

2

¹ Aden tantiaquin comapenen chuiquin unësquo icmenushe quec mibi yacno nidenquo iquebi caombi. ² Mibi unësquo ëmbi icmiac ¿tsuntsin ëbi bëdambo icmepatsiash? ¿Ëmbi icsambo icmeboedënda ëbi bëdambo icmepadic? Padenquo. ³ Aden tantiaquin mimbi iste dada uaombi ma ëbi bëdambo icmequid unësquo icmetiapimbo iquebi, qeshun. Bëdambo iquebi, quequin ëbi tantiec adquiobidi mibi icoatsiac, quequin tantiombi. ⁴ Unësquo yec shubiquimbi mibi dada uashun, Meneta, caondambi. Unësquo icmenu, quenquiocquin mibi comapenen tantiaquin dada uaondambi.

Abi icsaboed bëpiscudnueshun yued quiaid

⁵ Anocquidën ëbi unësquo icmedenequimbi adembidi comapenquiec unësquo mibi icmeoaosh. Aidi mibi chiondambi. ⁶ Aidi mibi dadpenshun cacumiac abi icsaid ënosh quec. ⁷ Adoacsho abi icsaid bëpiscudshun aidi yuedoquin bëdambo icme. Yuedenquo yac natiamianquiec unëstiadquo yantsiash. ⁸ Nuquibi iccuedednuna, quequin aid tantiaquin yued caimbi. ⁹ ¿Ëmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. ¹⁰ Aden ëmbi dada

uacpaden mimbi cacumiac abi icsaid ěnsho isun abi icsaid nibĕdabimboec bĕpiscudshun yued. Adsho tantiashun adomboembidi naimbi. Aidbĕdi abentsĕc yacbimboecquido yanosh, qesho tantiash abi icsaid bĕpiscudebi Esuquidistun tantianubi. ¹¹ Nuqui chieshĕnquidĕn Satanasĕn aidi icsamenushe qeshun abi icsaid ěmboed yuedta. Yuedenda, Satanasĕn quequin tantiamiac onqesho tantienda.

Nuquin Papan con Mayan meniaid adquid ěbĕdi tabadtequid nec, quiaid

¹² Esuquidistu chuibanuec shubu dadpen icquid Todoas caid yacno ěbi chonoc, Tantianu, quec cho-choquid dadpen icpondash. ¹³ Adquid dadpen icnubi ěmbi con utsi caid, Tito, mibi yacnoĕsh choabi icnuc ambo yuec tabadtiapimbo iccobi. Adash, Bĕquednu, quianec nidaid Masedonia caid yacno nidoapobi.

¹⁴ Bĕdambocquid mibi nec, Papa. Mimbi Esuquidistu tantiaquid ěbi yacpadquido icmeshun mimbi, Esuquidistu chuibeneta, caid ěbitedi nec. ěmbi chuibanaid noadte bĕdabimboecquid nec. Noadte bĕda pushudec noadsho uano-uanoec tabadquidon shĕdec. Adembidi, Esuquidistu ěbi yacpadquidon chuibenesho uano-uanoec tabadquidon tantiec. ¹⁵⁻¹⁶ Esuquidistu chuibanac noadte bĕdan danoshquiaid shĕdabimboen utsibon tantiec. Adembidi, Esuquidistun ěbi chuibeneta caido Icho isacbimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ěnĕdenquio yec abĕd icquido aidtedi iquendac. Aden nuqui isquin Esuquidistu tantiesa icsho Nuquin Papan nĕsiatequid iquendac. ¿Tsutsi Esuquidistupadquidquio icpec? Adquid nibĕdec. Adesa icsho ambi, ěbi chuibeneta, caidquio nebi. Adquid icquin chuibenenubi ¹⁷ piucquid

bedte bunquin utsin-utsinquien Esuquidistu chuibanec. Adesa ëbipadquido iquec. Piuquid bednuequin ëbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

3

¹ ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bëdamboec tabadquin Esuquidistu Pabadon chuibanosh, quequin dada uata, ëmbi cac mimbi dada uaidtambi buampe? Padenquio. ² Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chëshëten pinchuquën tansiabimboecnuc paucudtiapimbocon Nuquin Icbon tantiamiohi. Adembidi icsamboec tabadboedi nëbi bëdamboec tabadsho isun Pabadon Esuquidistu chuibanaido Codinto yacnocquido nec, quequin adomboembidi tantiabededec utsibon. ³ ¿Abi tantiaquid icsho isun bëdamboec tabadmenuequin ambi cuënote bedshun dada uampicpadquidta mibi meniondash? Padenquio. Esuquidistu tantiasho isun unëstiapimbocquid aton Mayan abipadquidquio mibitedi meniondash.

⁴ Nuquin Papan tantiacpadomboen Esuquidistun, Ëbi chuibeneta, cac chuibanac Esuquidistu tantiaquid mibitedi yanacsho tantiec ëmbi chuibanaido aitedi nec, quequin tantiemi. ⁵ Ëmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiemi. ⁶ Ëmbibi Esuquidistu chuitiapimbo icsho Nuquin Papan Mayanën tantiamiac Esuquidistu chuibenequidquio nebi. Ambi, Nadomboen nata, quequin

dada uamiampicpadomboen chuibanta caidpenquio nebi. Ambi nadomboen nata, quequin dada uamiampidtedi natiapimbo yec aibëdi matses tabadtiapimbo iquec. Aton Mayan meniaidbëd tabadtequid nec.

Abi tantiaquido bëdambo icmetequid aton Mayan

⁷ Nuquin Papan nadomboen nata quequin chiaid cuënoten dada uacpaden nainquio yec matses abi yacno tabadtiapimbo iquec, quequin dada uampid meniac abi chënquiacpadec Moisesën bëtantiate comapenec bëchomauanquiech chënqueboedi macuësh budec bëdiambo chënquesho isadaidbon bëistiapimbo icpampic. ⁸ Nëbi Esuquidistu tantiaquid bëdambo icmequid aton Mayan abipadquid meniaid ënëdenquiocquidquo nec. ⁹ Ëmbi nadomboen nata quequin chiaid niacquid ëbëdi tabadtiapimbo iquec, quequin dada uaid Nuquin Papan meniac buanshun Moisesën aton matses ënëdenquiocnoc tabadmetiapimbo icambien matses icsaid bedshunash icsaisa abided ciudadec unësash uincuenquidën abi tantiaquido ënëdtiapimbocnoc tabadmendac. ¹⁰ Nëbi Esuquidistu unësaid tantiaquid ënëdtiapimbocquid nec, quequin chiac ambi dada uaid meniampid ënëdacbimboecquid nendac. ¹¹ Ai, nadomboen nata quequin chiaid Moisesën bedshun meniaid ënëdtequid icnubi bëdambo icmiantequid Nuquin Papan chomiaid icsaisa ënëdtiapimbo iquec.

¹² Aden tantiaquin, Esuquidistu nuqui tantiaid icsaisa yec ënëdtiapimbocquid nec, quequin chuibenequid nebi. ¹³ Moises Nuquin Papabëd onquec bëchomauanquiechoedi auëshquio nidec ushmaushmactsëcquio yanash matses ismenquiocnuec bëpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. ¹⁴ Nuquin Papan dada uaid Moisesën bëaid

tantiate bunesa abëd icquido icpampic. Adquiobidi pamumëdacbimboec isadaidbo abi tabadec. Nuquin Papan cuënoten dada uacpadquid isec onquec nëbi adquiobidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac. ¹⁵ Nadomboen nata quequin dada uaid Moises menepampid isec onquec pamumëdacbimboecquid isadaidbo utsi-utsiec iquec. ¹⁶ Esuquidistu tantiaquid icsho Nuquin Papan Mayanën paucquin tantiamiaid nendac. ¹⁷ Nuquin Icbo icsaisa icquin ënden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. ¹⁸ Paucac, Ëbi icsaid bedshunash Esuquidistuded cuidadpanëdash, quequin nuqui tantiec. Aidënquiobi icsaisa icquin abipadquid nuqui meniac aton Mayanën adquid nuqui icmebanec.

4

Nuquin Papan nadatiambocquin nadenequin Esuquidistu chuibenemiaid

¹ Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. ² Icsash ompodquid icboedi nëbi muesa icquin Nuquin Papan chiaid utsi uainquio yec nuqui bëdamboec tabadec. Nuquin Papan isec, quec adequi nuqui tabadec. Adec tabadec ëbipadquid utsi yansho isash Nuquin Papan chiaid tantiate utsibo bunquiopec. ³ Esuquidistu chuibansho utsin-utsinquien bëdamboen tantiatiapimbo iquec. Adquid Nuquin Papabëd tabadiapimbocquid nec. ⁴ Nuquin Papapadquid Esuquidistu tantiaquid icnushe queshun icsamianuequidën Satanasën pamunacbimboen utsi-utsien tantiamenquio iquec. ⁵ Ëmbibi naid chiesa

nebi. Matsesën Icho Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. ⁶ Abitedi uanuna, qeshun, “Inchëshquio icboedi uëshëmbo yanquiota,” capampic Nuquin Papan. Adomboembidi Nuquin Papan chiaid pamumëdadbimboen tantienquiochoedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

⁷ Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi. ⁸ Aden chuibansho mëyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? qesho Nuquin Papan dayacquio icmedenebi. ⁹ Èbi chieshënquid dadpen icnubi èbi bëdambo icmequid aidi iquec. Comapenen cuestanec, Unësec, qeshun nianaqui abi Esuquidistu chuibenembi. ¹⁰ Esuquidistu mëyanquin unës uacpaden mëyanquin unës uatsen-unës uatsenshobi dayacquio icmedenioshi. Adoacsho uincuenaidën dayacquio icmedeniaid nec, quequin utsibon isbededebi. ¹¹ Adembi Esuquidistu chuibansho unës uatsiashi, quequin chuibenec nebi. Aid chuibansho unës uatsenaqui abipadquid unësesa yanebi, quec bëdamboec tabadebi. ¹² Aden tantiaquin aid chuibanac abi tantiaquid yanash aidbëdi tabadec unësesa mibitedi yanendac. ¹³ Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. ¹⁴ Aden tantiaquin Nuquin Papan Esuquidistu uincuemiapaden aidbëdi tabadmenuen mibitedibëdtabi ëbëd icquidtedi uincuemendac, quequin chiembi. ¹⁵ Aid tantiaquid ma mibi icpanueshun chuibansho mëyanaid nebi. Mëyanaqui utsi dadpen Esuquidistu tantiaquido ma

yanu qeshun chuibenec nebi. Aden chiac abi tantiaquid icsho isun, Mimbi naidtedi bédambo iquec, Papa, quequin ma Nuquin Papa utsibon chuipanuna.

¹⁶ Aden tantiec dayactiapibi quenquo iquebi. Tsusio budquimbi badiadquidën-badiadquidënquien Esuquidistu tantiadonequidquio yanebi. ¹⁷ Natiamiantequid ënëndendac. Natiamiaid yashic Nuquin Papa yacno tabadec bédamboshë iquendabi. Esuquidistupadquid icsaisa yec unësesa yanash ënëdtiapimbo iquendabi. ¹⁸ Aden tantiec, Ëbi natiamiaid iquec, quiashic, Nuquin Papabéd tabadendabi, quequin comapenen tantiec tsadebi. Ëmbi isaidtedi ënëndendac. Nuquin Papa yacnocquid ëmbi isacmaidtedibéd ënëdtemaid iquendabi.

5

Nuquin Papabéd tabadte iquendac quiaid

¹ Con nami shënibudash unësash nibëdnuc Nuquin Papabéd tabadec nami chuca uaid iquendabi. Nami chuca uaid ënëdtemaid matsesën nacenacmaid nec, quequin tantiembi. ² U abucquio nidabi yec uëshquequid nebi. Adquiocsho nami chuca uaid ënden meniondac, Cuishon, quetsiabi. ³ Aden meniac ëbibimboec isadsho isendac, quec tsadebi. ⁴ Nami chodquequid icnuc uëshquec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec. ⁵ Con Mado Esuquidistu tantiaquid ëbéd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec.

⁶ Aton Mayan meniaid iquec nami chodquetequid abi iquequi chieshenquo yec dayacquio yec nuqui tabadec. Adec tabadash abuc Nuquin Icbobéd tabadendabi, quequin nuqui tantiec. ⁷ Aton Mayan meniac

nuqui isacmaid Esuquidistu cainec nuqui tabadec. Ęmbi isaid ěmbi caintemaid nec. ⁸ Aden aid cainsho nami chodquesa badedquio menepashuni. Aden meniac Nuquin Icboběd iquendabi, quequin nuqui tantiec. ⁹ Aden tantiec nidaiděn tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiemi. ¹⁰ Adembidi abi tantiaquidtedishun naid ambi chuibante ushě chonoc Nuquin Icbon chuibanendac, quequin tantiemi. Utsi-utsien, Mimbi bědamboen nabanoc, quequin chuibanendac abitedishun naid cuidquin.

Ma utsibotsen abi tantiaquid icpanu quequin chuibanaid

¹¹ Aden ambi tantiacpaden nabansho, Bědamboen mimbi nabanoc, Nuquin Icbon ěbi caindac, quequin tantiaquin ma utsibontsen Esuquidistu tantiapanueshun mibi chuibenec nebi. Aid tantiaquin nabanec bědamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi. ¹² Aden tantiaquin, Mibi bědambo iquec, ěbi camenuen mibi dada uashunenquio iquemi. Ębi chienquiocquin, Bědamboec tabadquin ismiacimboecquiděn ěbi icsamboen chuisho aido chuita, quequin mibi dada uashunemi. ¹³ Aido, Pabaton tantiate icsabudosh quec. Adembidi, Nuquin Papan chiacpadomboen ěmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenuiocnobi. ¹⁴ Chian aněděnquequid icsambocquid něsianushe quiash matses icsaid bedshunash abided cuidadec icsaisa Esuquidistu uněspanědash, quequin ma utsibon tantiapanueshun chuibenec nebi. ¹⁵ Ma ěmbi naid chiac ěbi tantiaquido ma ěbědi icpanu, quiash uněsash uincuempanědash Esuquidistu.

¹⁶ Adec unēsash Esuquidistu uincuemanēdash, quequin matses unēsash uincuenta iquec, quequin abi tantiaquidon tantiec. Ĕnden, matsesquio Esus nec, quiondaidi nēbi, Nuquin Papan Chomiaid yec matses tantiec unēsash uincuemanēdash, quequin tantiembi. ¹⁷ Abi tantiaquid ambi tantiamiaid nec. Ĕnden matsesēn tantiacpadquiec icboedi Esuquidistun tantiacpadquiec bēdamboec tabadec abi tantiaquidquio. ¹⁸⁻¹⁹ Nuquin Papan Ĕndenquimboshē tantiampicpaden Esuquidistun naid nec. Nuquin Papan chiaid niacquid nuqui icboedēmbi matses icsaid bedshunash abided cuidadec Esuquidistu unēsapanēdash, quequin tantiaquin ma aidquio utsibon tantiapanu queshun ambi naid nuqui chuibenec. ²⁰ Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ĕbi icsaid bedshunash Esuquidistuded cuidadpanēdash, quequin abēd icnuequin aid tantiaquiota. ²¹ Ambi cuidtiadquid nuqui icnubi Esuquidistu icsaisaded Nuquin Papan cuidpanēdash ma Esuquidistu ambi cuidaidpadquid tantiaquidtedi icsaisa yampanueshun.

6

¹ Matses bēdambo icmenu, quequin Nuquin Papan chiaid bēpiscudmane queshun ambi tantiamiacpaden nabanec tabadta. ² Nuquin Papan chiampid chuinu. Tantia. “Mibi bēdambo icmete ushē chonoc cuēnsho tantiombi. Tantiesa icboedi nēid ushēnquio mibi tantiamiombi.” Aden Nuquin Papan chiampicpadomboen bēdamboen tantia. Nēbi Nuquin Papan bēdambo mibi icmenu cac, Ai, cata. Nēid ushēnquio ambi aton bacuē icmete ushē nendac.

Pabado natiamiaid

³ Icsamboec tabadquimbi Pabadon Esuquidistu chuibansho, Tantiatiapibi, utsibo quetiapimboecnoc bēdamboec tabadec nebi. ⁴ Nuquin Papan chuimiaid yec nadec tabadebi: Chieshenquoio yec dayacquiocquin ambi chiaid chuibenec bēdamboec tabadec nebi. Natiamiaid yec adequi tabadebi. ⁵ Utsin cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ěmbi chuibanac cuesnanubi padenquoio yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquieci bēdamboec tabadebi. ⁶ Icsainquoio yec bēdamboec tabadebi. Nuquin Papan chiaid tantesa uainquoio yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, qeshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi. ⁷ Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid ěmpanueshun. ⁸ Ĕbi chiec: Pabado bēdambo iquec, quenubi adequi tabadebi. Utsin ěbi chuioaic: Pabado icsambo iquec, quenubi adequi bēdamboec tabadebi. Ĕbi icsamboen chuinubi adequi bēdamboec tabadebi. Ĕbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. ⁹ Ĕbi isquiděmbi, Ĕmbi isacmaid Pabado nec, caqui ěmbi chuibansho tantiaboedo nec caimbi. Ĕbi unēs uate bunubi abi chuibanec capucuenebi. Mēyanaqui unēsabi yec nidebi. ¹⁰ Unēsquoio icmiaqui Esuquidistu tantiec

bëdambo iquebi. Con na nibëdsho isun adembidi Esuquidistu chuibanec nebi ma Esuquidistu tantiec utsibo bëdambo icpanueshun. Con na nibëdsho isash Nuquin Papan bacuë yec aton natedi con na nec, quequin tantiec tsadebi.

¹¹ Chuitiapibi, quenquiocquin ëbi natiaboedtedi mibi chuibanombi. Mibi comapenen tantiaquin ëmbi nabanaid mibi chuibanombi. ¹² Mibi tantiaquioquin chuibanquid ëbi icnubi ëbi tantiaquin chienquio mimbi iquec. ¹³ Pabadon con bacuëbo caido nebi, quequin mimbi naid mimbi tantiaidbëdta ompoenquiocquin ëbi chuiban, caimbi mibi.

Esuquidistu tantiesabëdtambi icsain nainda quiaid

¹⁴ Esuquidistu tantiesabëdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, qesa aton papa. ¿Nuquin Papan bëdambo icmiaidënda ambi chiaid niacquidbëdtan nabampadic? ¿Nuquin Papan Mayanën tantiamiaidënda Icbo chieshënquidbëdtambi chieshëmpadic? ¹⁵ ¿Esuquidistu Satanaspadquidta nedic? Padenquio. ¿Esuquidistu tantiaquid abi tantiesapadquidta nedic? Padenquio. ¹⁶ ¿Nuquin Papan ambi uaidbimboecnuc matsesën nacnenaid tantiaquidta aton Mayan Nuquin Papan meniaid icpadic? Padenquio. Abi tantiaquid aton Mayan menec. Nuquin Papan dada uamiampid dada uanu. Ista.

“Ëbëd icquidbëd iquendabi;

Aidbëdi capuebi;

Aton papa nebi;

Con matses adquido nec,

¹⁷ Con matses icquin ëbi tantiesan ëmbi chiaid niacpadomboen nainda.

Adecbidi aid icsacpadec tabadenda.

Adecbidi icsainquo yec tabad.

Adquid ëbëd iquec cho caindami.

¹⁸ Adquidon papa iquendabi;

Adquid ëmbi con madobëd con champi caid iquendac, quec Nuquin Papa.” Abi tantiaquido nadati-ambocquidën aden chiec.

7

¹ Naden nanuna, quequin Nuquin Papan chiac nuqui naid icsatedibëdtabi nuqui tantiaid icsatedi ënu, quequin Nuquin Papan chiacpadomboen nabanec tabadtenenuna.

Unësquo icboedi mimbi naid tantiaash bëdamboshë iquebi quiaid

² Adembidi, ëbëdtabi ëbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. ³ Pabado tantienquo yec icsaobi mibi camenuen nëid chuiquin dada uainquo iccombi. Mibitedi tantiec tsadebi, quequin padpiden chiembi. Abimbo caimbi. Unësequi mibi bëshuntiapimbo iquendabi. ⁴ Mimbi chiacpadpenquiocboedëmbi naosh, quequin choquidën chiohi. Aden chuisho tantiaashun, Nuquin Papan chiacpaden nabanquidquo nec, quequin mibi chiec nebi. Unësquo icboedi mimbi naid tantiaash bëdamboshë iquebi. Utsin natiamiaid icshobi bëdambo iquebi, mimbi ëbi camioc.

⁵ Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedëmbi tantesa uatsiash, quec quenenenquo iccobi. ⁶ Unësquo icsho ëbi tantiaquin Nuquin Papan Tito padpiden chomiosh ëbi bëdambo icmeoanuen. ⁷ Choashun mimbi aid tantiaquin nabanaid Titon chiohi. Adembidi, ëbi iste mibi bunaid chiohi. Mimbi dada uaid isash unësquo icquin, Codinto yacnocquidon mimbi

chiacpaden nabanosh, quequin Titon chioshi. Aden chiac bēdambohē yanobi ad yenquoio icboedi.

⁸ Mimbi dada uaid isash Codinto yacnocquido unēsquoio iccosh, quesho tantiash, Icsambo icchitobi, quenquoio iquebi. Aden dada uaic icsambo iccobi, quetiapimbo yequi mibi unēsquoio yacpadequi unēsquoio iccobi. Yuec mibi ad yenquoio iccoc. ⁹ Adecbidi nēbi bēdambo iquebi. Ĕmbi mibi unēsquoio icmiac mibi icsaid ēnquin Nuquin Papan chiacpaden nabanec, quec utsibo. Aden chuisho tantiaquin mibi unēsquoio icmequin mibi icsabudmiambo iccombi. Unēsquoio icmiaqui mibi bēdambo yanoc. ¹⁰ Unēsquoio icmiac, Nuquin Papan chiaid niaccombi, quiash unēsquoio icquin mibi icsaid mimbi ēnac. Adsho isun Nuquin Papan ēnēdtiapimbo noc aibdēd mibi icmendac. Aden unēsquoio icmiaqui, Bēdambo iquebi, mibi quendac. Adecbidi mibi icsacpadecc icsainquoio mibi icpendac. Padnuen Nuquin Papan chiacpaden niacquin ēnesa abi natiamiaiduidi tantiec Nuquin Papa yacno puduedtiapimbo iquendac. ¹¹ Padnuen mibi unēsquoio icmiac nēbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ēnoc. Adembidi, Ĕbi padpiden bēdamboen is, quequin Nuquin Papa mimbi chioc. Icsashun chienquiocboedēmbi nēbi cuembo bēdamboen chuinu, quequin mimbi chuibanoc. Aden mibi icsaid ēnacsho isun mibitedi icsaquin ēntiapimbo icquidēn nacpaden naisa nec, quequin tantiembi. ¹² Icsaquid ambi icsa uanaidbēdtabi chuinen mibitedi dada uainquoio iccombi. Abentsēc icsash abitedi unēsquoio iquec. Adquiecbidi ēbi unēsquoio icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin ¹³ Ĕmbi tantiacpaden naquín mimbi bēdambo

iquebi camiaid nebi.

Adembidi Tito yuedquin mimbi bēdambo iquebi cami-aidbidi niosh. Ēbi yuedenquioctsiash queboedi niosh. Yuedoshi, Tito qesho tantiash bēdamboshē iquebi.
¹⁴ Mibi nidmembī, Tito, qeshun, Ēbi yuedquin nashu-nacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ěmbi chuibocpadomboen mimbi nashunac. Aden tantiash, Abimbo chiombi, quepobi. Ēmbi mibi muainquioc-quin chuibanacpadec adquiobidi mibi nabanec tabadaid abimbo iccosh. Adomboembidi Titon mibi isbanosh.
¹⁵ Ēbitedi chushcatsiash, quequin mibitedishun Tito yuedpanēdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito.
¹⁶ Adoaidi ambia tantiaquid icquin ěmbi chiac mibitedishun nabanendac, quequin tantiembi. Aden tantiec bēdambo yec tsadebi.

8

Aton na nibēdquid icsho aton na dadpen icquid menequid

¹ Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nēbi bēdamboen nabanec tabadaid chuinu. Tantia.
² Natiamiaqui bēdambo iquebi quec aido tabadec. Adec tabadquin Esuquidistu tantiaquid utsibo tantiaquin menenuequin aton na daēdpactsēc musucshun dayun uaosh.
³ Ēmbi, Meneta, cainquiocnobi aton na bedtequid naimbudtsēcquien menenuequin bedbanosh.
⁴ Esuquidistu tantiaquid utsibo, nidaid Udeya caid yacnocquido, aton na nibēdec natiaic, quequin chiac Masedonia caid yacnocquidon, Aido menenuna, quequin comapenen chuiposhi.
⁵ Mitsana daēdpactsēc icnuc utsibo mimbi menetiapimbo icpec, quequin chuinu

quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. ⁶ Adomboen menenun bedbamposh. Adosho isun Tito nadombi. Mimbi ënden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiacteda bedbanoshe? Isnu, qeshun istanta, quequin Tito chiombi. ⁷ Naden naquid Codinto yacnocquido nec, quequin mibi tantiemi. Nuquin Papan Mayanën tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin ëmbi chiacpadomboen badedquio comapenen naquidquio mibi nec. Adembidi ëbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

⁸ Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. ⁹ Nuquin Icho Esuquidistu abuc tabadec abitedishun Icho icboedi nuquitsen abuc abëdi tabadmenuec matsesash nidaidën tabadnuc aton na nibëdpadene. Aidën matses tantiaquin nabanacpaden utsibo tantiaquin nabanta.

¹⁰ Ëmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaqin mimbi tauapondac. ¹¹ ¿Aden nanuna, qeshun mimbi chiacted ënquinda bedshun dayun uao? Padenquiocquin adota. ¹² Mitsana daëdpactsëc icnuc daëdpactsëc musuc-

shun menesho isash, Dadpen meneta, quenquo Nuquin Papa iquec.

¹³ Aton na nibëdquid icsho, Natiacquin meneta, quenquo iquebi. Aton na nibëdquid icsho aton na dadpen icquidën menec. ¹⁴ Mitsana dadpen icquid mimbi musucshun meniac aton na nibëdquid bëdambo iquebi, quepec. Aden meniac mibëdi aton na nibëdquid bëdambo iquendac. ¹⁵ Nuquin Papan dada uamiampid nad iquec. Chuinu. Tantia. Petequidëmpi Nuquin Papan mana caid meniaid chuiquin: “Shubun tabadquid dadpenshun aited-aitedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aited bedbanshun peshun napi uaid nibëdosh.” Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

Tito Codinto yacno nidte

¹⁶ Nëbi Tito mibi chuinu. Tantia. Èbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. ¹⁷ ¿Codinto yacno tsutsi nidpatsiash? quequin ëmbi chiac, Èbibi nidebi, quiosh Tito. ¹⁸ Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chiec. Bëdambocquid nec. ¹⁹ Nidaid Masedonia caid yacnocquidon, Esuquidistu tantiec iccuededquidon ëmbi dayun uaid Pabadobëdtan buanec nid caidbidi Titobëd nidquid nec. ²⁰ Aid daëd ëbëdi nidsho isash, Nuqui na buanquin ampetsiash, quetiapimbo ut-sibo iquec. ²¹ Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobëdtambi buanshunembi.

²² Tsyuec nidebi, quequin utsibobëdta Tido mibi yacno nidmembali. Ëmbi nata cac bëdamboen nabanquid aidtedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. ²³ Mibi nashunquin ëbëdtambi Esuquidistu chuibanquid Tito nec. Aidbëdi Esuquidistu tantiaquid utsi nidec. Esuquidistu tantiec iccuededquidon nëüëshquio puduanec Codinto yacno nidta caboedi Titobëd nidec. ²⁴ Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ëmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapanuna.

9

¹ Ënden Esuquidistu tantiaquid utsibo tantiaquin nashunta quequin ëmbi chiac, ² Adonona, qeshun mitsana bedbanquin mimbi tauaondac. Adsho isun nidaid Masedonia yacnoësh Esuquidistu tantiec iccuededquido mimbi menenuequin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanembi, queoaposh. ³ Aden aidon chuisho tantishun nuqui con utsi caido mibi yacno nidmembali mimbi chiondacaden bedbanambo icnushe qeshun. ⁴ Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimbi bedbanambocsho isash, Abimbo chiacbimboen chuichitombi, quec natiaic bëpiutsiabi. Adquiecbidi mibi icoaic. ⁵ Adquio icnushe qeshun utsiboba mibi yacno nidmembali. Aido mibi yacno choacsho mimbi chiondacted bedbanquin dayun uaid mimbi ismetsiac,

Abimbo chiombi, quequin. Aido chonoc mimbi chiacted bedbanquin dayun uambochoedëmbi nëbi mimbi bedbampec. Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unësquio icquin menetsiash. Aden tantiaquin menenda.

Nuquin Papan na dadpen bedmiaidën aton na nibëdquid menequid

⁶ Nuquin Papan chiaid chuinu. Adembi tantiata. Tied icbon daëdpactsëc nitsinac caniash ëshëacsho aidtedtsëcbidi bedpec; dadpen ambi nitsinac caniash ëshëacsho dadpen bedpec. ⁷ Adquiobidi aton na icquid iqueque. Tantia. Chuinu. Nëidted menenuequin ambi chiacted menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiacted meniash, Bëdambo iquebi, quetiapimbocquin menec. ⁸ Mitsana menete bunquin mimbi chiacted menesho isun Nuquin Papan uesadmenquiocquin mimbi bedmec ma utsi-utsien menebampanueshun. ⁹ Nuquin Papan dada uamiampid adomboembidi chiaid nad iquec:

“Nuquin Papan dadpen bedmioshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac.”

¹⁰ Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi

meneoapec. ¹¹ Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

¹² Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac.

¹³ Meniacsho isash, Esuquidistu tantiaquid nebi, quequin abimbo chuiquidquio aid nec, quequin mimbi meniaid-bëdtambi utsibon mibi chuibanendac. ¹⁴ Adquidquio nec, quequin utsibon mibi chiec. Mimbi tantiamiacpadomboen nabanquidquio Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac. ¹⁵ Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuc ëbi icsaid bedshunash abided cuidadec unësash uincuempañëdash. Aidpadquid utsi nibëdec, Papa, quequin nuqui chiec.

10

Ëmbi dada uacpaden mibi yacno choshon adomboembidi nabanembi quiaid

¹ Comapenec chushquenquiocquin matses bëdamboen tabadmenucquin chuibanquid Esuquidistu icpañëdash. Mibi yacno choshon Esuquidistupadquid icnuequin ëbi chieshënquid bëdamboen tabadmenucquin chuibanendambi. Ëbi chieshënquido nadec onquequin ëbi naden chiec, quec. Nuquibëd tabadquin dacuëdabimboecquin comapenen Pabaton chushcainquio iquec. Utsi yacno nidshun dada uaquin comapenen chushcaic, quiosh. Mibi chiec adosh. ² Adsho tantiaash mibi yacno choash

tabadquin chushcante bunenquio icquimbi, Ambibi tantiacpaden nabanquid Pabado nec, quequido bēdamboen chuibanembi. ³ Esuquidistu tantiaquid yanshun icsaquidēn tantiacpaden nabanesa nebi. ⁴ Mibi yacno choshon matsesēn tantiacpadpenquiocquin Nuquin Papan tantiamiacpaden ēbi chieshēnquido Satanasēn icsamboen tantiamiaido Nuquin Papan chiaid chuibanendambi. ⁵ Satanasēn tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibēdec, qeshun ěmbibi tantiacpaden naic bēdambo iquec, quequin tantiamiaido nec. Aden tantiaquid icscho isun ambi icsamboen tantiec pamumēdadbimboe yaid ěmenu quequin Nuquin Papan chiaid ěmbi chuibanubi abi pamumēdadbimboe yaid padpidec pausdtiapimboen paucbanshun ambi tantiacpaden Nuquin Papan pausunendac ma ambi chiacpadomboen namenuequin. ⁶ Aden chuibanshun Nuquin Papan chiacpadomboen utsin-utsinquien abi icsaid ěnabicsho isun comapenen cuidendambi.

⁷ Ambi isaiduidi tantiec utsi-utsiec onquec. Aido onquiaid chuinu. Tanta. Esuquidistu tantiaquid nebi, quequi, Pabado icsactsēcquio isadtsec, quepec aido. Aden chuiquido, Esuquidistu tantiaquid nebi, ěbi qesho tantiaash, Muec nec, quetiapimbo iquec. ⁸ Abi tantiaquid ěbi yansho, Esuquidistun, Ěbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ěbi chieshēnquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ěmbi chiacpaden naimbi mibi yacno choshon caimbi. ⁹ Adquid nebi, quequin,

Dacuëdampambocquid Pabado nec camenuen dada uain-
 quio iquemi. ¹⁰ Mibi aden dacuëdmenu, quenquo
 icnubi ëmbi dada uaondaïd bedshun isun naden utsin
 ëbi chiosh quec. Chuiquidën comapenen chushquequin
 chiacpadomboen Pabado dada uaic. Nëmbo choshon
 ambi dada uaquin chiacpaden chuitiapimbo icpec. Chi-
 chompibictsecsho ëbi isun, Chuiquidida nepec, quetsëc-
 quin istsëccombi. Tantiatiapimbo noc chuibanondash,
 quequin aidon ëbi chiec. ¹¹ Aden ëbi chiec onquequidën
 bëdamboen tantiata. Chuinu. Ëmbi dada uacpaden mibi
 yacno choshon adomboembidi nabanembi caimbi.

¹² ¿Esuquidistun, Ëbi chuibeneta, caid nebi, quepecta
 ëbi chieshënquido iquec? ¿Adenda Esuquidistun,
 Ëbi chuibeneta, caidënquo utsi icsamboen chuipec?
 ¿Esuquidistun, Ëbi chuibeneta, caid nebi, quequin
 abimbo chuiquidquo yec muaquin chuiquidpadquid
 nebi, quepectabi ique? Padenquo iquebi. Esuquidistun,
 Ëbi chuibeneta, caid nebi, quec muaid chuiquin
 abipadquid utsibëdtambi icsamboen nabanash,
 Nuqui bëdamboen naoc, cananec. Ambia icsamboen
 nabanquidën chuibanquin ismiac ambibi tantiacpaden
 nabanec abipadquid yanquidon. ¹³ Ëbien Nuquin
 Papan tantiamicpaden chuibanquid nec. Ambi
 tantiamicpaden mibitedi chuibanquid nebi. ¹⁴ Codinto
 yacno nidshun anouidi tabadquin Esuquidistu chuiban,
 Nuquin Papan cac mibëd tabadquin chuibanondambi.
¹⁵ Adembidi, Utsi yacno nid, Nuquin Papan cac
 nidshun utsibon chuibanondash. Aden aidon chuibanac
 anocquidotsen Esuquidistu tantiaquid yanondash. Aido
 Esuquidistu tantiaquid yansho isash ëmbi chuibanaido
 nec, quenquo iquebi. Mibëdi tabadquin ëmbi chuibanac
 aid tantiaquid mibitedi yanondac. Adsho isash
 Esusquidistu tantiadonequidquo yampashun, quec mibi

tantiec tsadebi. ¹⁶ Esuquidistu ëmbi chuiban-chuibanac aid tantiadonequiec mibitedi tabadsho isash Esuquidistu utsin chuibanacmanombo chuibananoaic nidendabi caombi. ¹⁷ Aden Esuquidistu chuibanac, Èbibi bédambo ictiapimbocquid mimbi bédambo icmiaid nebi, Papa, quequin ma Nuquin Papa Esuquidistu tantiaquidtedishun chuipanuna. ¹⁸ Bédamboen nabanombi, abibi qesho Nuquin Papan bédamboen istiapimbo iquec. Ambi, Bédamboen mimbi naoc, caiduidi ambi bédamboen isaidquio nec.

11

Pabado muesa icnubi muaquido

¹ Nēbi ëmbi dada uaid isash, tantiesa onquiabimboen mamēmenuequin Pabadon chiec, quenquicpashun caimbi mibi. Aden tantiatsiash, quequin abi dada uaimbi. Nēid bedash ëmbi abia dada uaondaic isec mibi onquiacpadec nēbi nēid mimbi iste dada uaid isec onqueta. ² Nuquin Papan tantiamiacpadec mibitedi cudasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amēn aton champi chiacbimboen, Esuquidistun bednu caid yec icsamenuequidēn, Bednu, cac, Bedadenda, caimbi. Esuquidistu ëmbi chuibanaido mibitedi bedec choeque. ³ Èmbi chuibanac Esuquidistu tantiauidquimbi nisi bédambo isadacimboecquidēn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. ⁴ Adec ëbi tsadnubi Codinto yacno choshon utsin Esuquidistu ëmbi chuiboed utsi uain chuisho badedquio tantiec aidon. Adembidi, Mayan utsi iquec, qesho tantiash, Èbi mene, quec mibi. Adembidi, Mibi bédambo icmequid Esus utsi iqueque. Aid tantiata, quequin ëmbi chiaid utsi uain

chuisho, Abimbo iquec, quequin tantiec mimbi. Aden utsibon ëmbi chuiboed utsi uain chuisho tantiec, qesho tantiash Esuquidistu tantesa uatsiash, quec tsadebi. ⁵ Esuquidistun ëbi chuibeneta cac Nuquin Papan tanti-amiacpaden chuibenec nebi. Aden chuibenenubi mibi, Bëdamboenshë utsibon chuibanacpaden Pabadon chuibanenquio iquec, qesho tantiash, Icsamboen chiombi, quetiapimbo iquebi. ⁶ Utsibon bëdamboenshë chiacpadec Pabado onquenquio iquec, mibi quenuc Esuquidistun, Ëbi chuibeneta, quequin ambia tantiaquidën tantiamiacpadomboen mibitedi chuibanombi bëdamboen tanti-aquin.

⁷ ¿Codinto yacnocquido ma Esuquidistun bëdambo icmepanueshun chuibanequi, Bec cho, quenquio yectabi icsape? ⁸ Mibi Esuquidistu chuibanu quiash Esuquidistu tantiec iccuededquid utsibon na ampiacbimboec tabadobi. Aidon aton na meniaqui aido nashunenquio yec mibi yacno nidash tabadquin mibi nashunquin Esuquidistu chuibanondambi. ⁹ Adec mibi yacno tabadquin Esuquidistu chuibanec bunec tsadec, Bec cho, quenquio iccondabi. Nidaid Masedonia caid yacnoësh choquidëmbini meniondash. Aden ënden, Bec cho, mibi cainquio iccondacpadec nëbi adquecbidi tsadebi. ¹⁰ Esuquidistun chuimaidquio nebi. Adquid icquin adquid nebi quequin chiembi mibëdi nidaid Acaya caid yacnocquid utsitedi, Padi. Aden chienda, quetiapimboenoc. ¹¹ ¿Atotsi quiashini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabadon tantiaid nec, quequin Nuquin Papan tantiec. ¹² Aden mibi tantiaquin, Bec cho, cainquiocquin Esuquidistu chuibenec nebi mimbi bëdamboenshë chuibanquid caid: Pabado nabanec tabadacpadec

tabadebi, quetiapimbo icnubi.

¹³ Aido Esuquidistun ëbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. ¹⁴ Aido tantiamequin ismequid Satanas nec. Nuquin Papan abi yacnoshon uaid mayan bëda aibdëdi tabadquido icsaisa yacpadquid nebi, quequin abipenquiocnoc chuiquin ismequin tantiamiac ¹⁵ adquiecbidi ambi namiaidtedi bëdambocquidbimboec capucuededec. Cuidte ushë chonoc aido icsaid Nuquin Papan comapenen cuidquin chiendac.

Pabadon abi mëyanaid chuibanaid

¹⁶ Adembidi chuinu. Tantia. ¿Mamëmenuequin tantiesa onquiacbimboendambi ëbi icaid chuibandio? ¿Utsin aden chuibanenquiocquin ëbi icaid chuibanuna, ¹⁷ Chuita, Nuquin Icbon cainquiocnobi. ¹⁸ Abi icaid utsin-utsinquien chuibanec, quequin tantiaquin adomboembidi ëbi icaid chuibanuna. ¹⁹ Bëdamboen tantiaquidquio nebi, qeshun mamëmenuequin ambembi chiacbimboen chuisho tantiec mimbi. ²⁰ Ambembi chiacbimboec, Yuanu, qesho tantiasch icsamboen tantiaquidbimboec mibi yuadte bumpec. Ambembi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquio yec tabadec mibi. Aden mitsana ambembi isash, Mibi chuiquid nebi, qesho tantiasch, ¿Tsuntsin mibi adquid icmiosh? quenquiocquin aidën chiacpaden nabanec mimbi. Aton yuabimboecnuc mibi mëyanaqui, Min yuapenquio nebi, quenquio iquec mibi. ²¹ Nuquin Papan yua icta cac, Padi, quetsiasch, quequin aden mibi chuitiadquidëmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto

yacnocquido quetsiash, quequin tantiaquin ëbi icaid chuibanu. Tantia. ²² ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Ëbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembidi, Ëbi Abadauanën tsyuecquid nebi, caimbi. ²³ ¿Esuquidistu chuibanquid nebi, quepecta aido iquec? Ëbibi Esuquidistun ëbi chuibeneta caidquio nebi. Esuquidistu chuibanquid ëbi yacpadquid utsi nibëdec. ¿Mibi mamënshumenuequindambi aden chuipadi? Padenquio. ¿Ëbi yacpadquid utsida iqueque? Tantiata. Chuibanu. Utsi bëdiactsëc chonoadnuc comapenec chonoadobi. Adecbidi quënën nauedaid utsi icnubi quënën nauedteniaid nebi. Adecbidi utsi bëdiactsëc cuesaid icnuc yuen cuesto-cuestoaid nebi. Mëyanac unëstsenobi, utsi quenubi aden mëyanac unëstsen-unëstsemboedi nebi. ²⁴ Isadaidbon cueshcanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquio cacuestonioshi. ²⁵ Adembidi cuesten cuesoshi. Yuecshun padpiden. Yuecshun padpiden. Adembidi cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi. ²⁶ Adecbidi quenenenquio yec capucuenequin Esuquidistu chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquio yec matses

nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquio yec capucueniobi. ²⁷ Con na bednuec chonoadec uëshquiobi. Padpiden-padpidemboen ushenquio icquin chuibanombi. Piasec acte bunquin adembidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquio yaqui adembidi chuibudombi. ²⁸ Ĕmbi chuiboed Esuquidistu tantiabenabicquido icpec, quequin capucuenequin chuibeniombi. Utsi yacno nidshun, Ĕmbi chuiboedo bëpiscudnushe qeshun mibitedi chuiquin dada uaombi. ²⁹ Esuquidistu tantiaquid chieshec dayactiapimbo icpec. Adquiobidi iccobi, quequin tantiec tsadebi. Esuquidistu tantiaquid icsaosh, qesho tantiash unësquio yec, Nëbimbobi icsamianquid comapenen cuidta, Papa, quec tsadebi.

³⁰ Aidedt ëbi icaid icnuc chieshenquio yec ëbi dayacquio yaid chuibanombi. Nëbi ëbi cuenondaid chuinu. Tantia. ³¹ Abia Yampidën, Nuquin Icbo Esuquidistun Papan nabanaid ënenquiocquin chuitequidquio iquec. Aidën nabanaid chuibanec muesa Pabado nec, quequin ëbi cuenondaid Nuquin Papan tantiec. ³² Ĕbi cuenondaid nad icpondashe. Chuinu. Tantiata. Damasco yacnocquido ancanquidën Adetas cuëmëdquidën Pabado Damasco yacnoësh puduensho bedta quequin shubu dadpen daquënë uaid dapa shëcuëtedi sondado ëctabëdmepondash. ³³ Adec daquënë uaid shëcuë cuëmanquio sondado tabadnubi bednushe qeshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiac ancanquidën bedadtiapimbo yec cuempondabi.

12

Nuquin Papan Pabado ismiaid

¹ Ĕbi icaid chuibanquin ěmbi dada uaid isbanash, Es-
 uquidistun ěbi chuibeneta caidquio Pabado nec, quequin
 Codinto yacnocquidon tantiatsiash, quequin adobam-
 boedtedi chuibanquin dada uaombi. Ĕbi icaid chuiban-
 quin ěmbi dada uaid isash, Abi natiamiaid dadpen
 icpec, quetsiash, quenquiocquin dada uaombi. Adembidi
 Nuquin Papan ěbentsĕqui ismiondaid chuinu. Tantia.
 Nad iccondashe. ² Ĕndenquimbo seta 14ted matamequin
 Nuquin Papan bĕdambohĕ yacno indopondashi. Intac-
 chobi abuc indopondashi, quetiapimbo iquebi. Tanti-
 enquio iquembi. Adecbidi ěmbi tantiateuidi indoac, que-
 tiapimbo icoaibi. Tsaudi, tantienquio iquembi. Nuquin
 Papambien tantiec. ³ Abuc bĕdambohĕ yacno in-
 dopondashi, quequin abimbo chiembi. ⁴ Abucshun
 utsi chuitemaidquio tantiapondambi. Ĕmbi tantiondaid
 chuitiapimbo icpebi. ĴMitsipadentsimbi ěmbi abucshun
 tantiaboed con onqueten chuipatsiaba? ⁵ Bĕdambo-
 cquid icsho Nuquin Papan abi yacno indondashi, quetiapimbo
 iquebi. Natiamiantequid dadpen icnuc ambo abuc nidabi
 yec bĕdambo-
 cquid nebi, quetiapimbo iquebi. ⁶ Abuc
 nidshun ěmbi isonda-
 id chuibanquin dada uaid isash, Bĕ-
 dambo-
 cquid Pabado nec, quequin tantianushe qeshun
 padenquio iquembi. Ĕbi bĕdamboec tabadsho isash,
 Pabado bĕdamboec tabadec, qesho tantiash bĕdambo
 ictsiabi. Adecbidi chuibansho tantiash, Abimbo chui-
 quidquio Pabado nec, qesho tantiash adecbidi bĕdambo
 ictsiabi.

Satanasĕn natiamiaid

⁷ Bĕdambo-
 cquid yansho Nuquin Papan abuc
 indoshon ismiondashi, quequin Pabadon chuinushe

qeshun Satanasën chomiaidën ëbi natiameded-natiamededsho isash, Chën, quenquo Nuquin Papa iquec. Satanasën chomiaidën natiamic pinchuquën siadaid namin nidaëdaid chictiapimbo yacbimboec con dada bëdanenquo iquec. ⁸ Adec con dada bëdantiapimbo icnubi, Ëbi natiamequid cueme, Icbo, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. ⁹ Adoaquien, Padi. Bëdambocquid icmenuequin naid nec. Mibi dayacquio icmequid con Mayan mibëdi iquec, quequin Nuquin Icbon chiondashi. Adoaqui, Bëdanambo icsho Nuquin Icbon ëbi dayacquio icmec quequin tantiec bëdambo iquebi, quec tsadebi. ¹⁰ Aden tantiec con dada icsambo icnubi Esuquidistu chuibenec capuebi. Ëbi icsamboen chuiquin mamënshunaqui adecbidi Esuquidistu chuibenec capuebi. Utsin natiamiaqui adquecbidi Esuquidistu chuibenec capuebi. Utsin mëyanaqui adquecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquio icmiac tsadtiapimbocquin chuibenec capuebi.

Esuquidistu tantiabemenuen chuibanombi quiaid

¹¹ Ëbi yacpadquid utsi nibëdec, quequin chienquioctiadquidi niobi. Esuquidistu chuibanquid utsibon chiaid tantiatequidquo iquec, qeshun mibëd icquidon ëbi icsamboen chiosh qesho tantiashun Pabado Esuquidistu chuibenequid nec, quenquo utsibo iccosh, qesho tantiashun ëbi icaid chuibanquin dada uaombi. Bëdamboen tantiacbimboen chuibanquid dadpen iquec. Aidon ic-sactsëcquo isadtsec, quequin ëbi chiec onquenubi Esuquidistu chuibenequidquo nebi. ¹² Natiamiaqui chieshenquiocquin Esuquidistu ëmbi chuibansho mibitedishun

tantiapondac. Adembidi nadatiambocquin ëmbi naban-sho mibitedishun isbededpondac. Adosho isun Esuquidistun ëbi chuibeneta caidquoio Pabado nec, quequin chuiti-adquidëmbi padenquoio mimbi icpondac. ¹³ ¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquoio iccondabi. ¿Bec cho, queshoda ëbi bëdamboen mimbi tantiatsemponda? ¹⁴ Ènden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquoio iquendabi. Mitsana bunesa nebi. Esuquidistu tantiaquidquoio ma icpanu quequin mibëdi tabadquin chuibanendambi. Aton bacuëbo tantiaquin amën anibëdtan ambia tantiaquid icquin tied uaic adembidi shubu uaic bacuëmpibon nabantiapimbo icnubi. ¹⁵ Adquibidi mibitedi tantiec Esuquidistubëd icquido yampec quec chonoadec tsusiobudquimbi chuibenendambi. ¿Ëmbi mibitedi comapenen tantiaasho isunda mimbi ëbi tantienquoio yampe? ¹⁶ Bec, cho, quenquoio yec mibëdi tabadondabi. Adsho isash, ¿Piucquid bedenquoio icpecta Pabado tabadash? Muaquin chuiquin bedpash icnui, quec mibi. ¹⁷ ¿Mitsipadentsimbi bedpa? ¿Ëmbi mibi yacno nidmiaidonda muaquin chuiquin mitsana bedpash? Padenquoio. ¹⁸ Titobëdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquoio icboc. Aidbëdi abentsëc yacnimboen tantiaquidquoio nebi. Aduidequi tabadquid ëbi daëdi nebi. ¹⁹ ¿Pabado ampesa nec mibi camenuendambi dada uaquin chuibampo? Padenquoio. Esuquidistu tantiaquid icquin mibi aid tantiabemenuen chuibanombi. Ëmbi chuibanaid abimbo iquec, quequin Nuquin Papan tantiec. ²⁰ Mibi yacno choash ëbëdi abentsëc yacnimboen tantienquoio icnushe

qeshun dada uaimbi. Comapenec chushcanansho istuid-
 mane qeshun adembidi mimbi iste dada uaimbi. Mitsana
 nibëdnuc utsin na dadpen icsho isash chushcanansho
 tantiatuidmane qeshun mibi dada uashunembi. Utsi
 muaquin chuisho tantiamane qeshun adembidi dada
 uaimbi. Abipenquo chuisho tantiamane qeshun adem-
 bidi dada uaimbi. Bëdambo icquid ëbi icnubi utsi
 padenquo iquec qesho tantiamane qeshun adembidi
 dada uaimbi. Mimbi tantiacpadpenquiocquid icsho isash
 comapenec cuëdcuededsho tantiamane qeshun adem-
 bidi dada uaimbi. ²¹ Ai, mibi yacno choashun adquid icsho
 isun, Ëmbi Esuquidistu chuibaniaido nec, quequin Nuquin
 Papa chuitiapimbo yec natiaic bëpiuac bimboec tsadmane
 qeshun dada uaimbi. Icsadenequidën abi icsaid ënabi
 icsho isash aido unësac bimboecquid nec, quiash unësquo
 icmane qeshun dada uaimbi. Aidon naid utsin istemaid-
 quio nec. Ambibi ambi chudtemaid chudted-chudtedec
 icsambo yequi, Bëdambocquid nebi, quec muacuededec.

13

Icsaid ënesa chuiquin cuidendambi quiaid

¹ Mibi yacno daëdec puduedashic padpidec puduedend-
 abi. Choshon, Icsadenequid iquec, quequin daëdshun-
 daëdshunquien chuisho tantiendambi. Abentsëcshun:
 Icsaquid iquec, quequin chuisho tantiatiapimbo iquend-
 abi. ² Tauamboec puduedshun Esuquidistu chuibanac abi
 tantiaquido mibitedi yanondac. Padpidec puduedoashun
 icsadenequid icsho isun, Mibi icsaid ënta, cac paden-
 quiocsho padpidec puduedoashun Nuquin Papan tanti-
 amiacpadomboen mibi adquid utsibobëdta comapenen
 chuiquin cuidembi, quequin chiondambi utsitedishun
 tantianubi. ³ Esuquidistun tantiamiacpaden Pabadon

dada uaid nec, quequin ¿mitsipadentsimbi tantiape? quequid comapenec onquequin chuibanembique. Tanti-aquiota, caimbi. Esuquidistun nadatiambocquin nac-paden ëmbi nasho mibitedishun ispondac. Aidën tantiamiac padpidec puduedshun adomboembidi mibi is-meoaambi. ⁴ Aidi matsesash nadatiapenquoio icquid-bimboecsho isun cuesten dectampanëdash. Adoacsho Nuquin Papan uincuemiatic unësesa yanquiopanëdash. Aid tantiaquidquo icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

⁵ Esuquidistu tantiaquid nebi, qeshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, qeshun Esuquidistu ëbëd ictiapimbo iquec, quequin tantiata. Aid mibëd icnuc ambi chiaid niac-niaquenquoio mimbi iquendac. ⁶ Adecbidi, Pabado Esuquidistun ëbi chuibeneta caidta neque. Isnu, quequidën ëbi nabanec tabadsho isun, Pabadon abimbo chiosh, capashuni mimbi. ⁷ Aden tantiaquin Codinto yacnocquido bëdamboen tabadmeta, Papa, quequin chuided-chuidedembi. ¿Mibi bëdamboec tabadsho isash, Pabadon chuibanaiado nec, quequin mibi isquidon chuitsiash, quequindambi Nuquin Papa chuided-chuidedpadi? Padenquoio. Esuquidistun ëbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquoio Codinto yacnocquido nec, quequin utsibon chuisho tantiatiadquoio iquebi. ⁸ Nuquin Papan chiaid abimbo iquec, quequin ambi chiaidquoio chuibanquidquiobidi nebi. Ambi chiaid utsi uain chiesa nebi. ⁹ Mibi bëdamboec tabadsho isash

bëdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. ¹⁰ Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibëdsho isun comapenen chienquio icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi. ¹¹ Nëbi ënquin dada uaimbi. Icsaisa icnu quec Nuquin Papan chiacpadec bëdamboec tabadta. Ëmbi dada uain chiaid isquin adobanta. Abentsëc yacbimboen tantiaquin nabanec tabadteneta. Adec tabadsho isash tantianquidquio utsibëd bëdamboec tabadquidquio Nuquin Papa mibëdi iquendac. Aidënquio mibi adquidquibidi icmendac. ¹² Ëbi isec cho cananta. ¹³ Mibi tantiec tabadebi, quec nëmbo tabadquido Nuquin Papan bëdambo icmebanaido. ¹⁴ Nuquin Icbo Esuquidistun bëdambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ëbëd iquec, quequin tantiaquiota. Padi. Aidedi dada uaimbi.

Esuquidistu Chuiquin Tantiamente
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

